

# Peperangan di Timur Tengah Mengesewakan Seluruh Negara Islam

Şahyūnī telah menyerang negara-negara Arab. Dengan serangan itu negara-negara Arab seumumnya telah bersatu menentang dan membala serangan-serangan Şahyūnī di semua medan perang dengan melupakan dengan serta-merta akan perselisihan dan pertantangan mereka sesama mereka. Sekarang menjadi satu tugas bagi seluruh umat Arab berjihad untuk menghapuskan negara Isarel yang ditaja oleh imperialis di tanah Arab dengan kekuatan dan paksa. Di dalam peperangan ini, yang berlaku selama enam hari tentera Israel telah mendapat kemajuan yang pesat dan dalam masa itu Majlis Bangsa-bangsa Bersatu menghendaki supaya diadakan genjatan senjata yang terpaksa mesti dipatuhi.

Kemunduran tentera-tentera Arab di semua medan adalah dengan kerana serangan-serangan kecerobohan yang dimulai oleh Israel dengan cara besar-besaran dan dengan angkatan udara yang besar, dengan dibantu oleh Amerika dan British, seperti yang disebut oleh *President Gamal Abdel Nasser*, dapatlah mereka di dalam pukulan yang pertama meranapkan angkatan-angkatan udara negara-negara Arab. Dengan demikian dapatlah mereka menguasai medan perang dan angkatan datarnya maju dengan cepat dengan dipayungi oleh angkatan udaranya. Ini adalah suatu cara perang *modern* yang tidak memerlukan jarak dan biasa berlaku.

Tetapi adakah dengan berhentinya Tembak-menembak perjuangan melawan Israel tamat? Tidak! Medan siasah dan ekonomi terbuka. Kita jangan terperanjat mendengar berita-berita di akhbar dari syarikat-syarikat kawat kerana dunia mengetahui bahawa boleh dikatakan syarikat-syarikat berita itu banyak dipengaruhi oleh Yahudi dan sebab itulah terasa bagaimana dakyah Yahudi bertalu-talu dimasukkan di dalamnya. Peperangan di medan siasah dan dahsyatnya di medan ekonomi adalah hal yang berbahaya. 90 peratus bahan minyak boleh didapatnya dari Iran sedang Iran telah mengemukakan mereka menyebelahi orang-orang Arab dalam semua soal dan akan menyertai Arab memboikot negara yang menyokong Israel,

British dan Amerika, dan lainnya dan mereka tidak akan menjual minyak kepada Amerika.

Dengan langkah-langkah ekonomi ini bagaimanakah negara-negara itu kelak akan menjalankan usaha-usahanya di dalam kejuruteraan? Bagaimana kereta kebal dan kapal-kapal terbang mereka? Mari kelak kita lihat kesan-kesannya.

Al-Malik Faisal dan juga Perdana Menteri Kuwait, al-Shaykh Jaber al-Ahmad telah menyatakan: Perang belum tamat dan mereka sedia mengorbankan apa-apa jua untuk meneruskan perjuangan di dalam semua medan.

## Bantuan Inggeris dan Amerika

Sebagaimana tajaannya mengadakan sebuah negara Israel pada tahun 1948 di tanah orang-orang Arab di Palestin maka imperialis-imperialis Inggeris dan Amerika dari semenjak itu tidak sunyi membantu dan menegakkan kedudukan negara itu. Dengan demikian adanya di sekeliling sempadan tentera-tentera Pertubuhan Bangsa-bangsa Bersatu, terutamanya di semenanjung Sinai, maka pada masa itu di dalam negara Israel itu, selama sepuluh tahun lamanya dengan diam-diam mereka bersiap mengadakan kekuatan-kekuatan tentera dengan cara *modern* dimodali dan dibantu oleh imperialis-imperialis dan juga oleh orang-orang Yahudi di luar negeri.

Dengan demikian mereka sebenarnya semenjak dari tahun 1956 terus-menerus mengadakan persiapan-persiapan sebagai sebuah negara tentera dan peperangan dengan tidak mengheboh-hebohkan segala kekuatan pertahanannya.

## Perpecahan Di Antara Negara-negara Arab

Di dalam masa itu, negara-negara Arab sendiri, timbul dua golongan – satu yang menamakan golongan Sosialis dan satu lagi menamakan golongan beraja. Golongan-golongan Sosialis yang dipimpin oleh Mesir atau United Arab Republic, menghendaki supaya seluruh negara-negara Arab bercorak kerajaan sosialis dan kerana itu di sana sini dihidupkan propaganda-propaganda untuk meruntuhkan dan menjatuhkan negara-negara yang beraja dan membangkitkan semangat rakyat supaya melawan pemerintah-pemerintah yang beraja itu dan demikian maka perpecahan di antara umat Arab sentiasa berjalan dan begitulah seterusnya apabila Israel lima enam bulan yang lalu telah mengebom sebuah kampung di Hebron sehingga hancur sekali, golongan-golongan orang Palestin dan golongan-golongan sosialis sendiri mencela dan mencabar kerajaan Jordan supaya bertindak keras dan cuba menjatuhkan Malik Hussein sendiri. Malik Hussein dituduh sebagai alat-alat imperialis di Timur Tengah dengan

kerana itu apabila kerajaan Jordan menghendaki kapal-kapal terbang buatan Amerika jenis yang terbaharu dihantar ke negaranya maka kerajaan Mesir memberitahu kepada Amerika bahawa tidak dibenarkan kapal-kapal terbang atau alat-alat senjata yang dibawa ke Jordan itu melalui Mesir. Begitu ketegangan yang berlaku sebalik daripada ketegangan yang terjadi di dalam mana Republik Arab Bersatu telah menghantarkan tentera-tenteranya ke Yaman untuk menegakkan satu pemerintahan republik yang menjadi patung daripada kerajaan Republik Arab Bersatu.

Begitu juga hubungan-hubungan di antara Syria dengan kerajaan-kerajaan Arab yang lain, dengan Jordan dan Sa'udī 'Arabiyyah boleh dikatakan telah putus. Pada masa penulis berada di Syria pada tahun 1966, awal tahun 1966, orang-orang Saudi tidak dibenarkan masuk ke dalam tanah Syria. Yang demikian maka nampaklah bahawa hubungan-hubungan itu semakin ketat.

### **Bersatu Semula Kerana Şahyūnī**

Tetapi apabila berlaku suatu peristiwa di dalam mana Syria terang akan diperkosa oleh Şahyūnī maka kerajaan Mesir berdiri untuk menentangnya dan pada masa itu kerana memandang bahawa Israel sebagai musuh pertama bangsa Arab seluruhnya dan umat Islam amnya maka dengan serta-merta seluruh umat Arab bersatu, melupakan segala perselisihan-perselisihan yang telah ditanam dan ditaja oleh Republik Arab Bersatu beberapa lamanya.

Demikianlah dengan propaganda-propaganda yang besar dengan tidak menilik cara-cara peperangan dan kekuatan-kekuatan musuh dalam masa dakyah-dakyah perang dilakukan dengan hebatnya, dan dalam masa melagang persatuan yang belum kompak itu, hanya baharu dilagang sahaja, masa itu Israel memandang bahawa sekiranya

sempat semua negara-negara Arab bersatu dengan satu persatuan yang kompak tak dapat tiada mereka tentu akan diserang dan kerana itu mereka pun lalu melanggar negara-negara Arab berjiran dengan suatu langgaran yang hebat, dengan langgaran-langgaran yang *modern*.

### **Israel Menguasai Udara Dengan Bantuan Amerika?**

Tidaklah menghairankan, jika peperangan cara baharu ini berjalan, sesuatu langgaran itu akan melumpuhkan musuhnya dengan serta-merta oleh yang melanggar, terutamanya di dalam keadaan musuh itu belum kompak bertahan. Peperangan sekarang bukan peperangan keberanian dan kegagahan dengan semangat tubuh peperangan sekarang, peperangan alat dan kerana itu apabila Israel melancarkan serangan-serangan maka serangan-serangan itu dilancarkannya yang utama sekali dengan serta-merta menggunakan sebanyak-banyaknya kapal terbang menuju sasaran-sasarannya terutamanya pada padang kapal terbang musuh supaya angkatan kapal-kapal terbang musuh hancur dengan serta-merta dan tidak dapat menyerang balas dan demikian mereka menguasai udara yang bermakna menguasai medan perang terutamanya pula di tanah medan yang berlaku itu tidak ada pokok bakau seperti tanah air kita ini tetapi semata-mata bergantung dengan tanah lapang dan padang pasir semata-mata – segala gerak-gerik terjadi di atas tanah dapat dilihat dan dengan demikian dapat ditumpaskan dari udara.

Yang menang ini tidaklah menghairankan apabila President Gamal Abdel Nasser mengatakan pada mulanya mereka menyangka bahawa serangan hanya datang dari udara tetapi-tetapi yang didatangkan dari Barat ertiinya kapal-kapal terbang musuh datang juga dari sebelah Barat dan yang demikian melahirkan bahawa Gamal Abdel Nasser

telah menuduh imperialis-imperialis Amerika dan Inggeris terutamanya Amerika menandingi tentera Israel untuk menghancurkan musuh lamanya, Mesir yang menjadi duri di Timur Tengah bagi penjajahan Inggeris dan Amerika itu. Tidakkah Lord Avon (Anthony Eden) Perdana Menteri British dahulu telah memutuskan menyerang Mesir tahun 1965 kerana masalah Terusan Suez dan kerana meruntuhkan pemerintahan Gamal Abdel Nasser? Ini menunjukkan dan membuktikan bahawa musuh-musuh lama mereka selamanya tidak senang kepada adanya pemerintahan Mesir di Timur Tengah.

Dengan demikian tidaklah memerlukan bahawa di dalam empat hari sahaja semenanjung Sinai habis, tentera Mesir terpaksa berundur. Ini adalah menjadi suatu pengajaran kepada dunia Arab seluruhnya bagaimana mereka berharap kepada bantuan orang dari luar, yang mengadakan janji-janji yang muluk-muluk, seperti negara-negara Komunis tetapi janji-janji itu tidak ditepati dan inilah yang menjadi sebab runtuhnya maruah orang-orang Arab di dalam perjuangan dengan Israel sebuah negara yang kecil itu.

### **Mustahaknya Bersatu**

Ini suatu pengajaran yang besar bagaimana mustahaknya persatuan umat Arab mesti dilagang, jangan hendaknya fahaman dan pengertian sebuah negara dipaksakan kepada sebuah negara yang lain tetapi hendaklah bersatu dan bersama untuk maslahat bersama di dalam sebuah nama bangsa iaitu Arab lagi bagi mempertahankan Palestin seluruh umat Islam mesti dilagang persatunya, mesti dibina dan jangan bercakar-cakaran.

Benar sebagaimana kata al-Malik Faisal di dalam ucapannya pada musim haji yang lampau yang mengatakan:

“Terbunuhnya seorang Yaman adalah kerugian bagi kita, terbunuhnya seorang Mesir di Yaman adalah kerugian bagi kita hilangnya senjata di Yaman adalah kerugian bagi kita dan mengapa kita sesama sebangsa, sesama seagama tidak memberhentikan perjuangan ini dan tidak mesti bersatu menentang segala musuh-musuh yang ada di sekitar kita.”

Ucapan beliau ini diucapkan di dalam masa berdengung-dengung di udara kata-kata fitnah-fitnah dan tumpuan-tumpuan permusuhan dihadapkan kepada jajahan kerajaan Sa‘udī ‘Arabiyyah. Di dalam peperangan ini juga tentu tidak sunyi ada kata-kata yang mengatakan kelemahan yang ada kepada Sa‘udī ‘Arabiyyah di dalam peperangan tetapi orang melupakan bangkitnya kerajaan Sa‘udī ‘Arabiyyah hanya selama tiga tahun iaitu sesudah al-Malik Faisal memegang tumpuk pemerintahan baharulah susunan-susunan negara diatur dengan lebih sempurna, pemuda-pemuda diantar ke luar negeri di dalam pelajaran-pelajaran di dalam ketenteraan, di dalam segala-galanya kerana kerajaan Sa‘udī ‘Arabiyyah walaupun kaya tetapi kurang mempunyai orang yang boleh digunakan dan boleh menjalankan peperangan-peperangan secara *modern* dan alat-alat *modern* – t idak bermakna bahawa dengan adanya alat-alat *modern* itu, yang boleh dibeli, akan dapat digunakan kalau tidak ada orang-orang yang mahir untuk menjalankannya.

Bagaiman hendak mengadakan latihan kepada negeri-negeri yang lemah, negeri-negeri yang terkebelakang, kalau jirannya telah maju seperti Mesir, Syria dan segala-galanya mengancam dan menindas yang lemah untuk meruntuhkan kekuasaan-kekuasaan kerajaan yang lemah di dalam ketenteraannya itu?

Inilah soalnya. Tetapi adakah ini bermakna kerajaan Arab telah lemah menghadapi Israel dan komplotannya imperialis-imperialis Amerika dan

Bitish sebagai tulang belakang menegakkan negara Israel di Timur Tengah itu? Tidak, medan politik dan medan ekonomi masih berjalan. Seruan-seruan dari kerajaan Kuwait untuk mengadakan persidangan-persidangan menteri-menteri luar seluruh negara Arab, dan semolek-moleknya dijemput juga negara-negara Islam, patut segera diadakan untuk menentukan dasar luar kerajaan-kerajaan Arab dan kerajaan-kerajaan Islam terhadap kepada peristiwa Palestin atau Baitul Maqdis yang di dalamnya terletak tanggungjawab bersama seluruh umat Islam itu.

Persidangan ketua-ketua negara Arab perlu diadakan dan rancangan mengadakan persidangan-persidangan kemuncak negara-negara Islam seluruhnya yang dianjurkan oleh al-Malik Faisal perlu ditaja dengan segera supaya persatuan dilagang dan pembinaan dapat ditegakkan menyusun semula barisan-barisan yang telah mundur itu kerana walau bagaimanapun tujuan asal daripada persatuan seluruh umat Islam umumnya dan bagi umat Arab khasnya iaitu mengeluarkan Israel daripada tanah Arab itulah tugas yang utama. Medan ekonomi sangat mustahak. Minyak di Timur Tengah semuanya terletak di dalam tangan negara-negara Islam, tidak ada negara-negara yang bukan Islam yang mempunyainya.

Minyak besar ertiinya kepada pembangunan cara *modern*. Amerika barangkali mencukupi untuk minyaknya tetapi negara-negara British, sekutu-sekutunya, bagaimana akan menjalankan dan melayarkan kapalnya, menerangkan penerbangan-penerbangan dengan kapal-kapal terbangnya yang besar kalau tidak ada minyak. Langkah kerajaan Mesir tidak membenarkan kapal-kapal dan kapal-kapal terbang British singgah di tanah airnya ini adalah satu langkah yang patut diikuti bukan sahaja ditujukan kepada Bristish tetapi juga ditujukan

Amerika yang menyokong dan membantu Israel dengan sepenuhnya sebagaimana yang dikatakan oleh Gamal Abdel Nasser.

Di dalam masa itu, di dalam masa bersatu, bertukar-tukar cerdik pandai di antara sesebuah negara dengan sebuah negara dengan bantu-membantu di antara satu sama lain yang mengadakan kilang-kilang membuat alat-alat senjata, membuat kapal terbang dan sebagainya mesti diadakan kerana banyak daripada negara-negara Arab yang kaya yang boleh mengadakan itu. Kalau sekiranya ini ada dan apabila tiba saatnya janganlah memutuskan sesuatu perkara di dalam meja rundingan tetapi ikutlah tauladan Israel sendiri pukul dahulu baharu berunding.

Ingatlah wahai umat Islam akan peristiwa di Hunayn di dalam mana umat Islam telah memegah dengan keagungannya dan kebesaran tenteranya tetapi percubaan Tuhan datang kerana kesombangan dan ketakburan kita sendiri, kerana besar cakap kita sendiri sehingga kita kalah. Kajilah sejarah, semoga sejarah itu kita akan dapat melagang persatuan dan dengan bersatu *in shā-Allāh*, seluruh umat Islam akan berkeyakinan bahawa kita akan menang kesudahannya. Janganlah di dalam kekalahan itu kita menangis dan berasa malu tetapi di dalam kalah kita ketawa, tetapi di dalam ketawa hendaklah kita siap sedia untuk medan yang kedua – menjadikan yang telah lalu, peristiwa-peristiwa yang sudah-sudah sebagai gambaran dan cermin bagaimana rosaknya kita kalau kita satu sama lain tidak menunjukkan *ukhuwwah Islamiyyah* yang sebenarnya – tidak merapatkan persaudaraan kita bersama sebagai suatu bangsa, satu agama dan satu keturunan.